

**ხელშეკრულება
სახელმწიფო შესყიდვის შესახებ №**

ქ. თბილისი

-----2021 წელი

1. ხელშეკრულების დამდები მხარეები

ერთი მხრივ შპს „ჯიარ ლოგისტიკა და ტერმინალები“ (მის: ქ.თბილისი, თამარ მეფის გამზ.№15; საბანკო რეკვიზიტები: სს „ვითიზი ბანკი ჯორჯია“, ბანკის კოდი: UGEBGE22, ა/ა GE21VT6500000007773607; საიდ. კოდი - 202462101), შემდგომში წოდებული „შემსყიდველად“, წარმოდგენილი დირექტორის -----სახით და მეორეს მხრივ

მიმწოდებელი: -----; საიდენტიფიკაციო კოდი: -----;

მისამართი, ტელეფონი: -----

დირექტორი: -----

საბანკო რეკვიზიტები: -----; ბანკის კოდი: -----; ა/ა: -----

(შემდგომში „მიმწოდებელი“), საქართველოში მოქმედი კანონმდებლობის შესაბამისად და მათი გათვალისწინებით, შეთანხმდნენ სახელმწიფო შესყიდვის შესახებ ხელშეკრულების პირობებზე და სახელმწიფო შესყიდვის შესახებ ხელშეკრულების დადების თაობაზე.

**2. ხელშეკრულების (შესყიდვის) ობიექტი, შესყიდვის საშუალება,
ხელშეკრულების ღირებულება და ხელშეკრულების მოქმედების ვადა**

2.1 ხელშეკრულების (შესყიდვის) ობიექტია: 20'(ფუტიანი), 40'(ფუტიანი), 45' (ფუტიანი) კონტეინერების ძარისა (სავარაუდო რაოდენობით: 10 000 ცალი) და რეფრეჟერატორული კონტეინერების ძარის დაზღვევა (სავარაუდო რაოდენობით: 100 ცალი) (შემდგომში „დაზღვევის ობიექტი“) დანართი N1-ის (პრეისკურანტი) შესაბამისად.

2.2 შესყიდვის საშუალება: ელექტრონული ტენდერი აუქციონის გარეშე NAT -----.

2.3 ხელშეკრულების საერთო ღირებულება შეადგენს ----- ლარს. ხელშეკრულების ღირებულება მოიცავს, როგორც შესყიდვის ობიექტის ღირებულებას, ასევე წინამდებარე ხელშეკრულების შესრულებასთან დაკავშირებით მიმწოდებლის მიერ გაწეულ ყველა ხარჯს და საქართველოს კანონმდებლობით გათვალისწინებულ გადასახადებს.

2.4 კლასიფიკატორის კოდი - CPV- 66510000 - სადაზღვევო მომსახურებები.

2.5 ხელშეკრულება ძალაშია ხელშეკრულების გაფორმებიდან 2022 წლის _ _ _ ჩათვლით.

3. ზოგადი დებულებები

მოცემული დოკუმენტი წარმოადგენს დაზღვევის ხელშეკრულებას (შემდგომში “ხელშეკრულება”) “მზღვეველსა” და “დამზღვევს” შორის.

3.1. განმარტებები

3.1.1 „ხელშეკრულება სახელმწიფო შესყიდვის შესახებ“ (შემდგომში - “ხელშეკრულება”) - შემსყიდველსა და მიმწოდებელს შორის დადებული წინამდებარე ხელშეკრულება, რომელიც ხელმოწერილია მხარეთა მიერ, მასზე თანდართული ყველა დოკუმენტით.

3.1.2 ხელშეკრულების ღირებულება - საერთო თანხა, რომელიც უნდა გადაიხადოს შემსყიდველმა მიმწოდებლის მიერ ხელშეკრულებით ნაკისრი ვალდებულებების სრული და ზედმიწევნით შესრულებისათვის.

3.1.3 „შემსყიდველი“ - ორგანიზაცია, რომელიც წინამდებარე ხელშეკრულების საფუძველზე ახორციელებს შესყიდვას.

3.1.4 „მიმწოდებელი“ - პირი, რომელიც წინამდებარე ხელშეკრულების ფარგლებში ახორციელებს მომსახურების მიწოდებას.

3.1.5 „მომსახურება“ - წინამდებარე ხელშეკრულების მე-2 მუხლით გათვალისწინებული ხელშეკრულების საგანი.

3.1.6 „დაზღვევის ობიექტი“ - 20'(ფუტიანი), 40'(ფუტიანი), 45' (ფუტიანი) და რეფრეჟერატორული კონტეინერების ძარა.

3.1.7 „მზღვეველი“ - იგივე „მიმწოდებელი“.

3.1.8 „დამზღვევი“ - იგივე „შემსყიდველი“, პირი, რომელიც წინამდებარე ხელშეკრულებით გათვალისწინებული პირობებით და მოქმედი კანონმდებლობის საფუძველზე აზღვევს „დაზღვევის ობიექტს“ „მზღვეველისთვის“ სადაზღვევო პრემიის გადახდის სანაცვლოდ.

3.1.9 „მოსარგებლე“ - პირი, რომელიც წინამდებარე ხელშეკრულებით გათვალისწინებული პირობებით და საქართველოს კანონმდებლობის საფუძველზე იღებს სადაზღვევო ანაზღაურებას. - „შემსყიდველის“ მიერ „მიმწოდებლისთვის“ მითითებული საქართველოს პორტებში ოპერირებული საზღვაო ხაზები.

3.1.10 „რეისი“-გამგზავნ (საწყის) ტერმინალებიდან კონტეინერის გადაადგილება დანიშნულების ადგილამდე და ასევე აღნიშნული კონტეინერი უკან დაბრუნება მოსარგებლეს მიერ მითითებულ ტერმინალზე

3.1.11 სადაზღვევო პოლისი - დაზღვევის დამადასტურებელი დოკუმენტი, რომელიც „მიმწოდებელმა“ უნდა წარუდგინოს „შემსყიდველს“ წინამდებარე ხელშეკრულებით გათვალისწინებულ ვადაში და რომელიც თან დაერთვის წინამდებარე ხელშეკრულებას და წარმოადგენს მის განუყოფელ ნაწილს.

3.1.12 სადაზღვევო თანხა - სადაზღვევო ანაზღაურების მაქსიმალური ლიმიტი, მზღვეველის პასუხისმგებლობის მაქსიმალური ლიმიტი. სადაზღვევო თანხა არ უნდა აღემატებოდეს დაზღვევის მიღების მომენტში არსებულ კონტეინერის რეალურ ღირებულებას და აღინიშნება სადაზღვევო პოლისში.

3.1.13 სადაზღვევო შენატანი (პრემია) - დამზღვევის მიერ გადასახდელი თანხა, რომელიც წარმოადგენს მზღვეველის მიერ გასაწევი სადაზღვევო მომსახურების საფასურს.

3.1.14 სადაზღვევო შემთხვევა - წინამდებარე ხელშეკრულებით და მისი დანართების პირობებით განსაზღვრული შემთხვევები, რომელთა დადგომისას წარმოიშვება მზღვეველის ვალდებულება, გასცეს სადაზღვევო ანაზღაურება წინამდებარე ხელშეკრულების პირობების შესაბამისად.

3.1.15 სადაზღვევო რისკი - მოვლენა, რომელიც შეიცავს მისი დადგომის შესაძლებლობის და შემთხვევითობის ნიშნებს და რომლის გამოც ხდება დაზღვევა. სადაზღვევო რისკები განისაზღვრება წინამდებარე ხელშეკრულებით და სადაზღვევო პოლისით.

3.1.16 სადაზღვევო პერიოდი - წინამდებარე ხელშეკრულებასა და სადაზღვევო პოლისში მითითებული დროის მონაკვეთი, რომლის განმავლობაშიც დაზღვევა ძალაშია.

3.1.17 ფრანშიზა - სადაზღვევო პოლისში მითითებული ზარალის ნაწილი, რომელსაც მზღვეველი არ აანაზღაურებს.

3.1.18 „დღე“, „კვირა“, „თვე“ ნიშნავს კალენდარულ დღეს, კვირას, თვეს.

წინამდებარე ხელშეკრულებაზე თანდართული დანართი N1 წარმოადგენს ამ ხელშეკრულების განუყოფელ ნაწილს.

4. დაზღვევის რისკები

4.1 წინამდებარე ხელშეკრულების საფუძველზე, „მზღვეველი“ კისრულობს ვალდებულებას დააზღვიოს „დაზღვევის ობიექტი“ ნულოვანი ფრანშიზით შემდეგი სადაზღვევო რისკებისაგან:

- დაზიანება;
- განადგურება;
- ქურდობა/ძარცვა/ყაჩაღობა (მათი მცდელობა);
- დამზღვევის პასუხისმგებლობა მის მიერ მოსარგებლესათვის დაბრუნების ვადების და მოცდენების ხარჯების ჩათვლით.

4.2 სადაზღვევო შემთხვევის დადგომისას ზარალის ანაზღაურება უნდა მოხდეს მოთხოვნილი საბუთების სრულად წარდგენიდან არა უმეტეს 10 (ათი) სამუშაო დღის ვადაში, ხოლო მიყენებული ზიანის შემთხვევაში (ქურდობა, ძარცვა, ყაჩაღობა (მათი მცდელობა), დოკუმენტების წარდგენიდან 1 (ერთი) თვის ვადაში.

5. მომსახურების განხორციელების წესი და პირობები

5.1 წინამდებარე ხელშეკრულების საფუძველზე დაზღვევას ექვემდებარება მხოლოდ ის „დაზღვევის ობიექტი“, რომელიც აკმაყოფილებს შემდეგ მოთხოვნებს:

- **20'** (ფუტიანი), **40'** (ფუტიანი), **45'** (ფუტიანი) და რეფრეჟერატორული კონტეინერები იმყოფება გამართულ მდგომარეობაში;
- მოსარგებლეს გააჩნია მათი შენარჩუნების სამართებლივი ინტერესი;
- გადაეცემა დამზღვევს მათი ტრანსპორტირების მიზნით;
- **20'** (ოცი) ფუტიანი კონტეინერები მაქსიმალური ღირებულებით **3500** (სამი ათას ხუთასი) აშშ დოლარი, **40'** (ორმოცი) ფუტიანი და **45'** (ორმოცდახუთი) კონტეინერები მაქსიმალური ღირებულებით **5200** (ხუთი ათას ორასი) აშშ დოლარი, რეფრეჟერატორული კონტეინერები მაქსიმალური ღირებულებით **35000** (ოცდათხუთმეტი ათასი) აშშ დოლარი.

5.2 თუ არასადაზღვევო შემთხვევის შედეგად მოხდება კონტეინერის დაგვიანებით დაბრუნება, მზღვეველი ვალდებულია მოახდინოს დაგვიანებით გამოწვეული ზარალის ანაზღაურება ყოველი ვადაგადაცილებულ დღისთვის, შემსყიდველის მიერ მითითებულ ნებისმიერი საზღვაო ხაზების მიერ დადგენილი სტანდარტული წესების/ტარიფების შესაბამისად.

5.3 მომსახურების გაწევის არეალი: დაზღვევის ტერიტორია შეზღუდული არ არის (გარდა გაეროს სანქციის ქვეშ მყოფი ქვეყნებისა).

5.4 მომსახურების გაწევის ვადა: 2021 წლის 16 თებერვლიდან/ხელშეკრულების გაფორმებიდან 12 კალენდარული თვე, დასვენების/უქმე დღეების ჩათვლით, 24 საათის განმავლობაში.

5.5 სადაზღვევო შემთხვევის შედეგად მიყენებული ზიანის ღირებულების შეფასებას განახორციელებს აუდიტორული მომსახურების დამკვეთის მიერ საკუთარი ხარჯით მოწვეული ექსპერტი, შესაბამისი აუდიტორული დასკვნის საფუძველზე.

6. მხარეთა უფლებები და ვალდებულებები

6.1 „მიმწოდებლის“ უფლება-მოვალეობები

6.1.1 მიმწოდებელს უფლება აქვს მოსთხოვოს შემსყიდველს ნაკისრი ვალდებულებების ჯეროვანი შესრულება.

6.1.2 მიმწოდებელი უფლებამოსილია მოსთხოვოს შემსყიდველს მომსახურების ღირებულების ანაზღაურება ხელშეკრულებით გათვალისწინებული ვადებისა და პირობების დაცვით.

6.1.3 თუკი მიმწოდებლის მიერ განხორციელებული მომსახურება არ შეესაბამება ხელშეკრულებით დადგენილ პირობებს, მიმწოდებელი ვალდებულია შემსყიდველის მოთხოვნისთანავე გამოასწოროს ეს ხარვეზი საკუთარი ხარჯით.

6.1.4 მიმწოდებელი ვალდებულია გაუწიოს შემსყიდველს წინამდებარე ხელშეკრულებით გათვალისწინებული მომსახურება კეთილსინდისიერად, ჯეროვნად და ხელშეკრულებით გათვალისწინებული ყველა პირობის სრულყოფილი დაცვით.

6.1.5 მიმწოდებელი ვალდებულია გადასცეს შემსყიდველს წინამდებარე ხელშეკრულებით გათვალისწინებული სადაზღვევო პოლისი წინამდებარე ხელშეკრულების ხელმოწერისთანავე.

6.1.6 მიმწოდებელი ვალდებულია „მოსარგებლესთან“ გააფორმოს შესაბამისი სადაზღვევო პოლისი წინამდებარე ხელშეკრულების პირობების გათვალისწინებით და წლის განმავლობაში უზრუნველყოს მოსარგებლესთან წინამდებარე ხელშეკრულებიდან გამომდინარე ან/და მის საფუძველზე წარმოშობილი ნებისმიერი სახის პრობლემის გადაჭრა და მისი წარმოშობის მიზეზების აღმოფხვრა ასეთი პრობლემის წარმოშობიდან უმოკლეს ვადებში.

6.1.7 მიმწოდებელი ვალდებულია სადაზღვევო შემთხვევის დადგომისას აუნაზღაუროს „მოსარგებლეს“ სადაზღვევო ანაზღაურება, დაზღვევის ხელთ არსებული სადაზღვევო შემთხვევის დამადასტურებელი დოკუმენტაციის სრულად წარდგენიდან არაუგვიანეს 10 (ათი) სამუშაო დღისა, ხოლო ქურდობის, ძარცვის ან ყაჩაღობის შემთხვევაში - ასეთი სადაზღვევო შემთხვევის დამადასტურებელი დოკუმენტაციის წარდგენიდან არაუგვიანეს 1 (ერთი) თვის ვადაში.

6.1.8 მიმწოდებელი ვალდებულია განიხილოს შემსყიდველის პრეტენზიები და მიაწოდოს მოტივირებული პასუხი ყველა საკითხზე, აგრეთვე დაუყოვნებლივ უზრუნველყოს აღმოჩენილი ხარვეზის აღმოფხვრა.

6.1.9 მიმწოდებელი ვალდებულია განახორციელოს ამ ხელშეკრულებით და დაზღვევის პირობებით მასზე დაკისრებული სხვა ვალდებულებები.

6.2 „შემსყიდველის“ უფლება-მოვალეობები

6.2.1 შემსყიდველს უფლება აქვს მოსთხოვოს მიმწოდებელს წინამდებარე ხელშეკრულებით ნაკისრი ვალდებულებების კეთილსინდისიერად და ჯეროვნად შესრულება ხელშეკრულებით გათვალისწინებული პირობების სრული დაცვით.

6.2.2 შემსყიდველს უფლება აქვს მოსთხოვოს მიმწოდებელს წინამდებარე ხელშეკრულებით გათვალისწინებული სადაზღვევო პოლისის ხელშეკრულებით გათვალისწინებულ ვადაში მისთვის გადაცემა.

6.2.3 შემსყიდველს უფლება აქვს მოსთხოვოს მიმწოდებელს სადაზღვევო ანაზღაურების მოსარგებლისათვის ანაზღაურება წინამდებარე ხელშეკრულებით გათვალისწინებული პირობების დაცვით.

6.2.4 შემსყიდველი ვალდებულია გადაიხადოს სადაზღვევო პრემია წინამდებარე ხელშეკრულებით დადგენილი წესით და ვადებში.

6.2.5 უზრუნველყოს დროულად იმ საზღვაო ხაზების ჩამონათვალის მიწოდება მზღვეველისთვის, რომელთანაც უნდა გააფორმდეს სადაზღვევო პოლისი.

6.2.6 შემსყიდველი ვალდებულია სადაზღვევო შემთხვევის დადგომის ფაქტის გაგებიდან არაუგვიანეს 48 საათის განმავლობაში შეატყობინოს მიმწოდებელს სადაზღვევო შემთხვევის შესახებ, ხოლო კონტეინერის რეისიდან არ მისვლის შესახებ - დამზღვევის მიერ კონტეინერის გაგზავნიდან 21 დღის ვადაში.

6.2.7 შემსყიდველი ვალდებულია წარუდგინოს მიმწოდებელს მის ხელთ არსებული, სადაზღვევო შემთხვევის დამადასტურებელი ყველა დოკუმენტაცია ასეთი სადაზღვევო შემთხვევის შესახებ შეტყობინების მიმწოდებლისთვის გაგზავნიდან არაუგვიანეს 5 სამუშაო დღის ვადაში.

7. გასაწევი მომსახურების ხარისხი

7.1 მიმწოდებელი იღებს ვალდებულებას, რომ გაწეული მომსახურების ხარისხი უპასუხებს ხელშეკრულებით გათვალისწინებულ პირობებს და დააკმაყოფილებს შემსყიდველის მოთხოვნებს მოქმედი ყველა საჭირო ნორმების, სტანდარტების, წესებისა და მოთხოვნების დაცვით.

7.2 ხელშეკრულების მოქმედების ნებისმიერ ეტაპზე და ასევე მისი მოქმედების დასრულების შემდგომ, აღმოჩენილი ხარვეზის ან/და ნაკლის არსებობის შემთხვევაში, მიმწოდებელი ვალდებულია შეტყობინების მიღებისთანავე გონივრულ ვადებში, მაგრამ არაუმეტეს **2 (ორი)** კალენდარული დღის ვადაში გამოასწოროს ნაკლი, შემსყიდველის მხრიდან დამატებითი დანახარჯების გაწევის გარეშე.

7.3 მიმწოდებლის მიერ ამ მუხლით განსაზღვრული ვალდებულების შეუსრულებლობის შემთხვევაში შემსყიდველს უფლება აქვს მოსთხოვოს მიმწოდებელს შესაბამისი ხარჯების ანაზღაურება.

8. ხელშეკრულების შესრულების კონტროლი

8.1 შემსყიდველს ან მის წარმომადგენლებს უფლება აქვთ განახორციელონ ტექნიკური კონტროლი ან/და შეამოწმონ მომსახურება, რათა დარწმუნდნენ მათ შესაბამისობაში კონტრაქტით გათვალისწინებულ ტექნიკურ პირობებთან.

8.2 მიმწოდებელი ვალდებულია საკუთარი რესურსებით უზრუნველყოს ხელშეკრულების პირობების შესრულების კონტროლის განხორციელებისათვის აუცილებელი პერსონალისა და ტექნიკური საშუალებების გამოყოფა, ასევე უზრუნველყოს საჭირო სამუშაო პირობები. იმ შემთხვევაში, თუ შემსყიდველი ორგანიზაცია ხელშეკრულების პირობების შესრულების კონტროლის მიზნით გამოიყენებს საკუთარ ან მოწვეულ პერსონალს, მის შრომის ანაზღაურებას უზრუნველყოფს თვითონ შემსყიდველი ორგანიზაცია.

8.3. შემსყიდველი შესყიდვის ობიექტის მიწოდების კონტროლს ახდენს სისტემატიურად, საკუთარი შეხედულებისამებრ. კონტროლი ხორციელდება როგორც შუალედური ფორმით - შესყიდვის ობიექტის მიწოდების პროცესში, ისე მისი დამთავრების შემდგომ. შემსყიდველი იტოვებს უფლებას, ხელშეკრულების მიმდინარეობის ნებისმიერ ეტაპზე მოახდინოს დამატებითი კვლევა.

8.4 მიმწოდებელი ვალდებულია საკუთარი ხარჯებით უზრუნველყოს კონტროლის შედეგად გამოვლენილი ყველა დეფექტის ან ნაკლის აღმოფხვრა და წუნდებით გაწეული მომსახურების ხელახალი შესრულება.

8.5 მიმწოდებლის მიერ ხელშეკრულებით ნაკისრი ვალდებულებების შესრულების კონტროლს შემსყიდველის მხრიდან განახორციელებს _____

9. შესყიდვის ობიექტის მიღება-ჩაბარების წესი

9.1. შესყიდვის ობიექტის მიღება - ჩაბარება განხორციელდება ყოველთვიურად, ფაქტობრივად გაწეული მომსახურების მიხედვით შემსყიდველისა და მიმწოდებლის უფლებამოსილი წარმომადგენლების მიერ მიღება-ჩაბარების აქტის გაფორმებით.

9.2. შემსყიდველის მხრიდან მიღება-ჩაბარების აქტის გაფორმებაზე უფლებამოსილ პირს წარმოადგენს _____

9.3 ყოველი თვის ბოლოს მიმწოდებელსა და შემსყიდველს შორის მოხდება შესრულებული რეისების გადამოწმება და შეთანხმებული რეისების შესაბამისად მზღვეველი ვალდებულია წარმოადგინოს ფაქტიურად განხორციელებული მომსახურების ანგარიშფაქტურა (ინვოისი).

9.4 მიღება-ჩაბარების აქტების გაფორმების პარალელურად, მიმწოდებელი ვალდებულია წარმოუდგინოს შემსყიდველს შესაბამისი საგადასახადო დოკუმენტაცია (მოქმედი კანონმდებლობის შესაბამისად).

9.5 იმ შემთხვევაში, თუ მიღება-ჩაბარების აქტის გაფორმების დღე ემთხვევა არასამუშაო დღეს, მაშინ მიღება-ჩაბარების აქტის გაფორმება შესაძლებელია განხორციელდეს მომდევნო სამუშაო დღეს, რაც არ ჩაითვლება მიმწოდებლის მხრიდან ვადის გადაცილებად.

10. ანგარიშსწორება და ანგარიშსწორების ვალუტა

10.1 ანგარიშსწორების ვალუტა – ლარი.

10.2 წინამდებარე ხელშეკრულების ფარგლებში გადახდა განხორციელდება უნაღდო ანგარიშსწორების ფორმით, „მიმწოდებლის“ წინამდებარე ხელშეკრულებით განსაზღვრულ საბანკო ანგარიშზე თანხის ჩარიცხვის გზით.

10.3 შემსყიდველი წინამდებარე ხელშეკრულებით გათვალისწინებული სადაზღვევო პრემიის გადახდას განხორციელებს ყოველთვიურად, შესრულებული რეისების მიხედვით გადახდილი კონტეინერების რაოდენობის შესაბამისად და წინამდებარე ხელშეკრულების 2.3 მუხლით გათვალისწინებული ტარიფებით.

10.4 სადაზღვევო პრემიის გადახდა უნდა განხორციელდეს მიმწოდებლის მიერ ყოველი თვის დასრულებისთანავე წარმოდგენილი და შემსყიდველის მიერ დადასტურებული ანგარიშგაქტურის (ინვოისი) შესაბამისად მხარეებს შორის მიღება-ჩაბარების აქტის ხელმოწერიდან 10 (ათი) კალენდარული დღის ვადაში.

10.5 იმ შემთხვევაში, თუ ამ ხელშეკრულების მე-17 მუხლით გათვალისწინებული წესით საჯარიმო სანქციის გამოყენებასთან დაკავშირებით შეტყობინების მიღებიდან 10.4 პუნქტით გათვალისწინებულ ანგარიშსწორებამდე მიმწოდებლის მიერ არ იქნება წარმოდგენილი საჯარიმო სანქციით დაკისრებული თანხის გადახდის დამადასტურებელი დოკუმენტი, შემსყიდველი უფლებამოსილია მიღება-ჩაბარების აქტით განსაზღვრული შესყიდვის ობიექტის ღირებულების ანაზღაურებისას, ხელშეკრულების პირობების დარღვევის გამო საჯარიმო სანქციით დაკისრებული თანხა დაუქვითოს მას, რის შემდეგაც მიმწოდებელს ჩაერიცხება დარჩენილი თანხა.

10.6 წინასწარი ანგარიშსწორება (ავანსი) არ გამოიყენება.

11. ხელშეკრულების პირობების შეუსრულებლობა (საჯარიმო სანქციები, ფორმა, ოდენობა და გადახდის ვადები)

11.1 ფორს-მაჟორული პირობების გარდა, ხელშეკრულების დამდები მხარეების მიერ ხელშეკრულების პირობების შეუსრულებლობისა ან/და დაგვიანებით შესრულების შემთხვევაში გამოიყენება საჯარიმო სანქციები.

11.2 ხელშეკრულებით ნაკისრი ვალდებულებების შეუსრულებლობის ან არაჯეროვნად შესრულების (გარდა შესრულების ვადის დარღვევისა) შემთხვევაში მიმწოდებელს დაეკისრება ჯარიმის გადახდა ყოველ ჯერზე ხელშეკრულების ღირებულების **2%-ის** ოდენობით.

11.3 ხელშეკრულებით ნაკისრი ვალდებულებების შესრულების ვადის, მათ შორის ხარვეზის აღმოფხვრის ან/და ნაკლის გამოსწორებისათვის განსაზღვრული ვადის გადაცილებისათვის მიმწოდებელს დაეკისრება პირგასამტეხლოს გადახდა ყოველ ვადაგადაცილებულ დღეზე ხელშეკრულების ღირებულების **0.25%-ის** ოდენობით.

11.4 მიმწოდებლის მხრიდან ხელშეკრულების შეწყვეტის შემთხვევაში მიმწოდებელს დაეკისრება ჯარიმა ხელშეკრულების საერთო ღირებულების 5%-ის ოდენობით.

11.5 საჯარიმო სანქციით დაკისრებული თანხა გადახდილ უნდა იქნას ამ ხელშეკრულების მე-17 მუხლით გათვალისწინებული წესით საჯარიმო სანქციის გამოყენებასთან დაკავშირებით შეტყობინებიდან 5 (ხუთი) კალენდარული დღის ვადაში.

11.6 ხელშეკრულებით გათვალისწინებული ანგარიშსწორების ვადის გადაცილებისათვის მიმწოდებელი უფლებამოსილია შემსყიდველს დააკისროს პირგასამტეხლო ყოველ ვადაგადაცილებულ დღეზე, მიმწოდებლისათვის ჩასარიცხი თანხის **0.25%-ის** ოდენობით.

11.7 საჯარიმო სანქციების გადახდა არ ათავისუფლებს ხელშეკრულების მხარეებს ძირითადი ვალდებულებების შესრულებისაგან.

12. ხელშეკრულების შეწყვეტა

12.1 ხელშეკრულების დამდები ერთ-ერთი მხარის მიერ ხელშეკრულების პირობების შეუსრულებლობის ან არაჯეროვნად შესრულების შემთხვევაში, მეორე მხარეს შეუძლია მიიღოს გადაწყვეტილება ხელშეკრულების ცალმხრივად შეწყვეტის შესახებ.

12.2 ხელშეკრულების დამდები მხარე, რომელიც მიიღებს ასეთ გადაწყვეტილებას ვალდებულია შეატყობინოს მეორე მხარეს მიღებული გადაწყვეტილება, მისი მიღების საფუძველი და ამოქმედების თარიღი.

12.3 ხელშეკრულების შეწყვეტისას მხარეს შეუძლია მოითხოვოს ზიანის ანაზღაურება, რომელიც მას მიადგა მეორე მხარის მიერ ხელშეკრულებით ნაკისრი ვალდებულების შეუსრულებლობით.

12.4 ხელშეკრულება შეიძლება შეწყდეს მხარეთა წერილობითი შეთანხმების საფუძველზე.

12.5 ხელშეკრულების ცალკეული პირობების მოქმედების შეწყვეტა არ ათავისუფლებს მხარეებს დანარჩენი ვალდებულებების შესრულებისაგან.

12.6 შემსყიდველს უფლება აქვს მიიღოს გადაწყვეტილება ხელშეკრულების ცალმხრივად შეწყვეტის შესახებ, მათ შორის შემდეგ შემთხვევებში:

ა) მიმწოდებლის მიერ ხელშეკრულებით ნაკისრი ვალდებულებების ორჯერ დარღვევის შემთხვევაში;

ბ) თუ შემსყიდველისათვის ცნობილი გახდა, რომ მისგან დამოუკიდებელი მიზეზების გამო იგი ვერ უზრუნველყოფს ხელშეკრულებით ნაკისრი ვალდებულებების შესრულებას;

დ) საქართველოს კანონმდებლობით გათვალისწინებულ სხვა შემთხვევებში, მათ შორის მიმწოდებლის მიერ ხელშეკრულებით ნაკისრი ვალდებულების ნებისმიერი ისეთი დარღვევის დროს, რაც შეუძლებელს ხდის ნორმალური სახელშეკრულებო ურთიერთობის გაგრძელებას, ან იწვევს შემსყიდველის ინტერესის დაკარგვას სახელშეკრულებო ურთიერთობის გაგრძელებისადმი.

12.7 ამ მუხლის პირველსა და მე-6 პუნქტებში მითითებულ შემთხვევებში შემსყიდველი ვალდებულია აუნაზღაუროს მიმწოდებელს ფაქტობრივად გაწეული მომსახურების ღირებულება.

13. ფორს-მაჟორი

13.1 ფორს-მაჟორი - სტიქიური მოვლენები, გაფიცვები, საბოტაჟი ან სხვა საწარმოო არეულობა, სამოქალაქო მღელვარება, ომი, ბლოკადა, აჯანყება, მიწისძვრა, მეწყერების ჩამოწოლა, ეპიდემია, წყალდიდობა და სხვა მსგავსი მოვლენები, რომელიც არ ექვემდებარება მხარეთა კონტროლს და რომელთა თავიდან აცილებაც მათ მიერ შეუძლებელია. ფორს-მაჟორად არ ითვლება მიმწოდებლის ფინანსური მდგომარეობის გაუარესება, თუ ეს ჩამოთვლილ მოვლენებთან არ არის დაკავშირებული.

13.2 ხელშეკრულების პირობების ან რომელიმე მათგანის მოქმედების შეჩერება ფორს-მაჟორული გარემოებების დადგომის გამო არ იქნება განხილული, როგორც ხელშეკრულების პირობების შეუსრულებლობა ან დარღვევა და არ გამოიწვევს საჯარიმო სანქციების გამოყენებას და მიმწოდებლისათვის ხელშეკრულების შესრულების გარანტიის დაუბრუნებლობას.

13.3 ფორს-მაჟორული გარემოებების დადგომის შემთხვევაში ხელშეკრულების დამდებმა მხარემ, რომლისთვისაც შეუძლებელი ხდება ნაკისრი ვალდებულებების შესრულება, დაუყოვნებლივ უნდა გაუგზავნოს მეორე მხარეს წერილობითი შეტყობინება ასეთი გარემოებების და მათი გამომწვევი მიზეზების შესახებ, რომელსაც თან უნდა ახლდეს შესაბამისი დამადასტურებელი დოკუმენტაცია, მათ შორის, საჯარო სამართლის კორპორაცია „საქართველოს სავაჭრო სამრეწველო პალატის“ დასკვნა ფორს-მაჟორის დადასტურების შესახებ. თუ შეტყობინების გამგზავნი მხარე არ მიიღებს მეორე მხარისაგან წერილობით პასუხს, იგი თავისი შეხედულებისამებრ, მიზანშეწონილობისა და შესაძლებლობის მიხედვით აგრძელებს ხელშეკრულებით ნაკისრი ვალდებულებების შესრულებას და ცდილობს გამოახსოს ვალდებულებების შესრულების ისეთი ალტერნატიული ხერხები, რომლებიც დამოუკიდებელნი იქნებიან ფორს-მაჟორული გარემოებების ზეგავლენისაგან.

13.4 იმ შემთხვევაში თუ ფორს-მაჟორული გარემოებების დადგომის გამო, იცვლება ხელშეკრულებით გათვალისწინებული რომელიმე პირობა, აღნიშნული ცვლილება უნდა გაფორმდეს მხარეთა წერილობითი შეთანხმების სახით.

14. ხელშეკრულებაში ცვლილებების შეტანა

14.1 თუ რაიმე წინასწარ გაუთვალისწინებელი მიზეზების გამო წარმოიშობა ხელშეკრულების პირობების შეცვლის აუცილებლობა, ცვლილებების შეტანის ინიციატორი ვალდებულია შეატყობინოს მეორე მხარეს შესაბამისი ინფორმაცია. ამავე დროს შემსყიდველი არ არის ვალდებული წარუდგინოს მიმწოდებელს რაიმე მტკიცებულებანი იმ გარემოებებთან დაკავშირებით, რომლების გამოც წარმოიშვა ხელშეკრულების პირობების შეცვლის აუცილებლობა.

14.2 ხელშეკრულების პირობების ნებისმიერი ცვლილება (მათ შორის მხარეთა შეთანხმებით ხელშეკრულების შეწყვეტა) უნდა გაფორმდეს წერილობით - მხარეთა შეთანხმების სახით და დანართის სახით უნდა დაერთოს ხელშეკრულებას. მხარეთა წერილობითი შეთანხმება ცვლილების თაობაზე, ჩაითვლება ხელშეკრულების განუყოფელ ნაწილად.

14.3 ხელშეკრულების საბოლოო ღირებულება განისაზღვრება ფაქტობრივად მიწოდებული შესყიდვის ობიექტის ღირებულების შესაბამისად, რაც არ საჭიროებს დამატებით შეთანხმებას.

15. უფლებების გადაცემა

15.1 ხელშეკრულებით განსაზღვრული უფლება-მოვალეობების მთლიანი ან ნაწილობრივი გადაცემა ფორმდება მხარეთა წერილობითი შეთანხმებით (შემსყიდველი - მიმწოდებელი - მესამე პირი).

15.2 დაუშვებელია ხელშეკრულებაში მიმწოდებლის ჩანაცვლება, გარდა საქართველოს კანონმდებლობით გათვალისწინებული შემთხვევებისა (ორგანიზაციის შერწყმა, გაყოფა და სხვ.)

16. ღირებულება

16.1 მხარეთა შეთანხმებით დასაშვებია ხელშეკრულების საერთო ღირებულების შეცვლა.

16.2 მიმწოდებელთან დადებული ხელშეკრულების პირობების შეცვლა დაუშვებელია, თუ ამ ცვლილების შედეგად შემსყიდველი ორგანიზაციისათვის იზრდება ხელშეკრულების ღირებულება ან უარესდება ხელშეკრულების პირობები, გარდა საქართველოს სამოქალაქო კოდექსის 398-ე მუხლით გათვალისწინებული შემთხვევებისა.

16.3 საქართველოს სამოქალაქო კოდექსის 398-ე მუხლით გათვალისწინებული პირობების დადგომის შემთხვევაში დაუშვებელია თავდაპირველად დადებული ხელშეკრულების ღირებულების 10%-ზე მეტი ოდენობით გაზრდა.

16.4 ხელშეკრულების ღირებულების შეცვლა ფორმდება მხარეთა წერილობითი შეთანხმების სახით.

17. ურთიერთობა ხელშეკრულების დამდებ მხარეებს შორის

17.1 ნებისმიერი ოფიციალური ურთიერთობა ხელშეკრულების დამდებ მხარეებს შორის უნდა ატარებდეს წერილობით ფორმას. წერილობითი შეტყობინება, რომელსაც ერთი მხარე ხელშეკრულების შესაბამისად უგზავნის მეორე მხარეს, იგზავნება საფოსტო გზავნილის სახით. ოპერატიული კავშირის დამყარების მიზნით დასაშვებია შეტყობინების მეორე მხარისათვის მიწოდება ტელეფონის და ელექტრონული ფოსტის გაგზავნის გზით იმ პირობით, რომ შეტყობინების ორიგინალი შემდგომში წარედგინება მეორე მხარეს უშუალოდ ან ხელშეკრულებაში მითითებულ მისამართზე საფოსტო გზავნილის გაგზავნის მეშვეობით.

17.2 ტელეფონით და ელექტრონული ურთიერთობისათვის გამოყენებულ იქნება:

ა) მიმწოდებლის შემდეგი რეკვიზიტები: საკონტ. პირი ბ-ნი: -----, მობილური ტელეფონის ნომერი: -----; ელექტრონული ფოსტა: -----

ბ) შემსყიდველის შემდეგი რეკვიზიტები: საკონტ. პირი ბ-ნი: -----; მობილური ტელეფონის ნომერი: -----; ელექტრონული ფოსტა: -----

17.3 ხელშეკრულებაში მონაწილე ორივე მხარე ვალდებულია, ხელშეკრულების მოქმედების პერიოდში საკონტაქტო პირ(ებ)ის ან ინფორმაციის ცვლილება წერილობითი სახით აცნობოს მეორე მხარეს.

17.4 შეტყობინება შედის ძალაში ადრესატის მიერ მისი მიღების დღეს.

18. სადაო საკითხების გადაწყვეტა

18.1 ხელშეკრულების დამდები მხარეები თანხმდებიან მასზე, რომ ხელშეკრულების ან მასთან დაკავშირებული საკითხების ირგვლივ მათ შორის წარმოქმნილი ნებისმიერი დავა შესაძლებელია გადაწყდეს მხარეთა შეთანხმებით, ხოლო ასეთის მიუღწევლობის შემთხვევაში, დავა გადაწყდება მოქმედი კანონმდებლობის შესაბამისად საქართველოს სასამართლოს მიერ.

18.2 ზიანის ანაზღაურებასთან დაკავშირებით, გამოიყენება საქართველოს სამოქალაქო კოდექსის შესაბამისი მუხლები.

18.3 შემსყიდველს შეუძლია მოითხოვოს ზიანის ანაზღაურება, რომელიც მას მიადგა მეორე მხარის მიერ ხელშეკრულებით ნაკისრი ვალდებულების შეუსრულებლობით/ ვალდებულების დარღვევით (მათ შორის უხარისხო შესრულებით).

18.4 ხელშეკრულება დადებულია საქართველოს კანონმდებლობის შესაბამისად და ინტერპრეტირებული იქნება საქართველოს კანონმდებლობის მიხედვით.

19. სხვა პირობები

19.1 ამ ხელშეკრულებით გაუთვალისწინებელი პირობები რეგულირდება საქართველოს კანონმდებლობით.

19.2 ხელშეკრულება შედგენილია ქართულ ენაზე, სამ ეგზემპლარად, რომელთაგან თითოეულს აქვს თანაბარი იურიდიული ძალა და ინახება ხელმომწერ მხარეებთან (ერთი პირი მიმწოდებელთან და ორი პირი შემსყიდველთან). ხელშეკრულებასთან დაკავშირებული ნებისმიერი მიმოწერა შესრულებული უნდა იყოს ქართულ ენაზე.

19.3 წინამდებარე ხელშეკრულების ნებისმიერი ცვლილება ან დამატება ძალაშია მხოლოდ მას შემდეგ, რაც იგი წერილობითი ფორმითაა შედგენილი და ხელმოწერილი მხარეთა მიერ.

19.4 „ხელშეკრულების“ მუხლ(ებ)ი, პუნქტ(ებ)ი დანომრილია და დასათაურებულია მხოლოდ მოხერხებულობისათვის და ამ ფაქტს „ხელშეკრულების“ ინტერპრეტაციისათვის მნიშვნელობა არ ენიჭება. მუხლ(ებ)ის, პუნქტ(ებ)ის ან/და ქვეპუნქტ(ებ)ის დასათაურებაში ან დანომვრაში ცდომილების/სხვაობის არსებობის შემთხვევაში, გამოიყენება ამავე მუხლ(ებ)ის, პუნქტ(ებ)ის ან/და ქვეპუნქტ(ებ)ის შესაბამისი შინაარსის მქონე მუხლ(ებ)ი, პუნქტ(ებ)ი ან/და ქვეპუნქტ(ებ)ი.

19.5 „ხელშეკრულების“ ტექსტში მექანიკური ან/და ტექნიკური შეცდომის ან/და ხარვეზის არსებობის შემთხვევაში „მხარეთა“ მიერ, აღნიშნული შეცდომა ან/და ხარვეზი განხილული და განმარტებული უნდა იყოს „ხელშეკრულების“ შესაბამისი წინადადების (წინადადებების) ან/და შინაარსიდან გამომდინარე. იმ შემთხვევაში, თუ აღნიშნული შეცდომა ან/და ხარვეზი არ შეესაბამება „ხელშეკრულების“ სათანადო წინადადებას/წინადადებებს ან შინაარსს, მას (ხარვეზი/შეცდომა) „ხელშეკრულების“ შინაარსის განმარტებასთან დაკავშირებით არ ექნება (არ მიენიჭება) რაიმე მნიშვნელობა.

მხარეთა მიერ გამოყენებულია ელექტრონული ხელმოწერები